

## Sin via

Anina Sgier

«Exact tei enquerel jeu!», «Astgel jeu incantar tei per ina buna causa?» – Jeu sun perschuada ch'ils biars da vus ein silmeins inagada el decuors da lur veta vegni adressai d'in «dialoger». Mo tgi ei e tgei fa in «dialoger» atgnamein?

In «dialoger» ei ina persuna che lavura per bien romontsch sco «fundraiser» per ina organisaziun da beneficenza sco Vier Pforten, WWF, Amnesty International etc. La finamira ei d'anflar novs commembers, e quei sin via, savens alla staziun dil tren ni en loghens nua che bia glied passa el decuors dil di. Jeu savess prest pretender che la maioritad da vus ch'ei vegnida adressada ha rispundiu enzatgei semegliant al suandont: «Jeu hai tuppamein gest negina peda», «negin interess», «miu tren parta gleiti, stoi ir». Forsa haveis vus fatg in grond artg entuorn il «dialoger» per evitar ina confruntaziun ni essas fors schizun passai sperasvi senza far stem. Quei ein tut reacziuns quotidianas che jeu hai pertschiert la stad vargada durant miu temps da «dialoger». Mintgaton sa quei esser fetg frustrond, mo da l'auter maun ei il plascher ton pli gronds sch'ina persuna freina tuttenina ed ei prompta per in discuors.

Sche quei succeda vala ei d'attentar la persuna alla problematica e da perschader quella persuna da daventar nova commembra ni niev commember dall'organisaziun. Quei sa gartegiar, savens ei il success denton plitost restrenschiu.

Per succeder sto la tenuta d'in «dialoger» exnum cumprender fetg bia optimissen, plascher e bia resilienza. Aschispert ch'ins resenta stauncladad e pauc energia ei la probablidad d'anflar novs commembers pintga. Consequentamein semotivescha il team da «dialogers in l'auter durant igl entir di per mantener la buna energia.

In entir di sin via, e quei da tutta aura, sa esser fetg liung e stentus, cunzun sche certa glied ei buc exnum fetg curteseivla. Mo ei dat era scuntradas fetg interessantas e divertentas. Ins vegn en discuros cun ina fetg vasta paletta da persunalitads, seigi quei cun glied giuvna ni glied pli attempada, dunna ni um, glied fetg beinstonta ni glied al minimum d'existenza. Quei ei in factur che fa la lavur da «dialoger» zun fascinonta.

Era saver luvrar mintga di en in auter liug dalla Svizra tudestga ei enzatgei che jeu hai gudiu. Ils «dialogers» midan mintga di lur plaz da lavur, aschia ch'ins sa la damaun buc adina nua exact ch'ins vegn a luvrar. Plinavon san ins era mai tgei che spetga ins, cun quei ch'ins sa buca con bia glied ch'ei vegn ad haver en quei liug.

Il temps che jeu hai passentau sco «dialoger» ha purtau diversas investas, novas experienzas e naturalmein hai jeu era empriu fetg bia. All'entschatta hai jeu giu in curios sentiment da semplamein adressar glied jasta sin via, mo ins surmunta spert l'atgna retenientscha ed ei daventa enzatgei tut usitau. Vinavon hai jeu observau che glied cun mieds finansials plitost limitai ei savens stada ton pli beinvulenta e prompta da sustener l'organisaziun che glied pli

beinstonta. Mo era mia conlvrera ha giu raschun cun pretender che la lavur da «dialoger» seigi «l'universitad dalla via», cunquei ch'ins emprenda propi fetg bia.

Tgisà, forse prenda la proxima gada che vus vegnis adressai d'in «dialoger» cuort peda per in cuort discuors enstagl da passar vinavon. Vus vegnis nuota magliai!

## **Ils «zulprins»**

(fmr) Ils «zulprins», uschia sa numna la rubrica per auturas ed auturs giuvens, ina rubrica che cumpara en collavuraziun da la GiuRu Giuventetgna Rumantscha cun la FMR Fundaziun Medias Rumantschas. La finamira cuminaivla da GiuRu ed FMR è da dar spazi e vusch ad auturas ed auturs giuvens. Ils «zulprins» duain damai far qua u là sbrinzlas!

\* Dapli infurmaziuns davart la GiuRu sin [www.giuru.ch](http://www.giuru.ch) ubain via mail a [giuru@giuru.ch](mailto:giuru@giuru.ch).